

**PEMBERITAHUAN PERTANYAAN  
BUKAN JAWAB LISAN DEWAN RAKYAT  
MESYUARAT KE DUA, PENGGAL KE TIGA,  
PARLIMEN EMPATBELAS**

---

**PERTANYAAN : BUKAN JAWAB LISAN**

**DARIPADA : YB PROF. MADYA DR. RUSNAH BT. ALUAI  
(TANGGA BATU)**

**SOALAN**

**PUAN RUSNAH BINTI ALUAI [ TANGGA BATU ]** minta **MENTERI DALAM NEGERI** menyatakan pelan holistik untuk memerangi masalah banjir pendatang asing tanpa izin ke negara ini. Apakah faktor utama yang membolehkan pendatang tanpa izin boleh masuk dan bertapak di negara ini.

**JAWAPAN**

Tuan Yang Di Pertua,

Kementerian Dalam Negeri (KDN) memandang serius berkenaan masalah Pendatang Asing Tanpa Izin (PATI) di negara ini yang memerlukan strategi pembanterasan secara berterusan. Justeru, sebagai langkah memperkukuh tadbir urus dan menambah baik sistem kerja penguatkuasaan sedia ada, KDN sedang memperhalusi pelan strategik penguatkuasaan PATI yang lebih komprehensif dan menyeluruh.

Pelan Holistik Penguatkuasaan PATI yang akan dilaksanakan dalam tempoh lima (5) tahun ini merupakan strategi penguatkuasaan yang komprehensif untuk mengatasi permasalahan banjir PATI di negara ini dengan melibatkan kerjasama secara strategik di antara pelbagai Kementerian dan Agensi. Objektif pelan ini adalah mewujudkan satu ekosistem yang tidak selesa kepada PATI dalam meneruskan kehidupan seharian mereka melalui pendekatan mendaya upaya agensi penguat kuasa dan kawal selia sedia ada termasuk meningkatkan kerjasama strategik dan kesedaran masyarakat setempat.

Pelan Holistik Penguatkuasaan PATI ini menggariskan lima (5) strategi atau fokus utama iaitu:-

- (i) **Strategi Perundangan dan Dasar Penguatkuasaan PATI** yang menggariskan pelan pelaksanaan penggubalan undang-undang dan penyelarasan dasar berkaitan penguatkuasaan PATI;
- (ii) **Strategi Kawalan Sempadan dan Pintu Masuk** yang menggariskan pelan pelaksanaan pemantauan kawalan keselamatan di sempadan dan pintu masuk negara;
- (iii) **Strategi Pengurusan Pekerja Asing** yang menggariskan pelan penyelarasan dasar berkaitan pekerja asing;

- (iv) **Strategi Operasi Penguatkuasaan PATI** yang menggariskan pelan pelaksanaan berkaitan operasi penguatkuasaan membanteras PATI di seluruh negara; dan
- (v) **Strategi Media dan Publisiti** yang menggariskan pelan pelaporan media, publisiti dan program kesedaran berkaitan PATI.

Strategi-strategi yang digariskan dalam Pelan Holistik Penguatkuasaan PATI ini berlunaskan bidang-bidang fokus yang dikenal pasti bersesuaian dengan peranan agensi-agensi yang terlibat dan dibangunkan bagi memberikan impak signifikan ke arah peningkatan imej penyampaian perkhidmatan awam terutamanya pasukan penguatkuasaan.

**Tuan Yang Di Pertua,**

Kemasukan PATI ke negara ini berpunca daripada beberapa faktor yang dikenalpasti, antaranya adalah seperti berikut:

- (i) kestabilan ekonomi negara yang menarik PATI untuk mendapatkan peluang pekerjaan di Malaysia;
- (ii) kestabilan politik negara yang memberikan impak kepada keharmonian dan kemakmuran negara seterusnya mewujudkan ekosistem kehidupan yang kondusif bagi masyarakat tempatan dan warga asing; dan
- (iii) kecenderungan warga asing untuk tinggal melebihi tempoh masa yang dibenarkan berdasarkan syarat-syarat pas atau permit dan menyalahgunakan pas bagi tujuan yang berkepentingan.